

黔南叢書

第四集第一

黔南叢書第四集

詩經

據江辰六集原刻本校印

序

黔南叢書第三集印既竣諸君子續蒐黔人詩餘爲第四集以貴陽江辰六先生所著春蕪詞冠首辰六歛人也出爲新貴越氏後舉康熙二年貴州鄉試繼雖復姓而所爲文集仍署籍貴陽考越氏爲貴州著姓明宣德間有名昇者以經明行修召授播州訓導曾孫英宏治間鄉舉累官瀘州尋棄官居鄉里三十年日以詩文自娛有西園集子三民望民表民牧並以科名世其家嘉隆間越氏顯者十餘人見貴州通志及莫子偁所爲黔

詩紀畧萬曆之季河南巡撫其杰英之族昇之裔也仕  
熹宗毅宗兩朝倜儻傲岸積詩近萬首莫氏稱黔之先  
輩苦心爲詩無有逾於其杰者其詩沉思獨往覺古今  
皆非故以屢非名集亦可想其風尙辰六於其杰行輩  
未及考然承其家學淵源有自茗溪姚陟山且亟稱之  
其不忘貴陽宜矣又按其詞集共兩卷強半爲廬山作  
先生於燕齊晉楚足跡幾遍又僑居廣陵較久至其平  
生宦轍多在晉楚不在江右而何以廬阜之詞獨多且  
游亦似甚數就其政在堂文集中散見者一爲游廬山

記自述爲康熙七年辛亥七夕後三日記一爲與閔賓  
連書云昨到匡廬始知生平所到之山無出其右云云  
此外皆無可考安得先生年譜一爲參證也先生交游  
皆一時尊宿名滿大江南北所爲詩文集余所見有獨  
山莫氏藏本曾經眀叟手校甚冀其陸續覆印至其詞  
之工則卷首婁東秀水諸公評之已詳茲僅就其家世  
及其游踪之聲聲大者弁之簡端期與此邦賢士大夫  
商討拾遺補闕跂予望之余旣序雪鴻堂詩今承文獻  
徵輯館同人循例督序義不敢辭云丙子初秋綿竹曹

經沅敬序

[illegible]

春蕪詞序

尤侗

吾友吳蘭次才華敏妙以詞論之亦草堂中秦九也雅聞有壻江辰六風流吐納不減乃翁恨未識其人今秋寓桃葉渡孫子無言自廣陵郵書至發之得春蕪詞簞燈快讀江山眉目花月精神江子在焉呼之或出矣予尤喜其廬山諸作掇奇抉奧引入勝地如坐香鑪之峯飲珠簾之谷不止嘲風弄月作兒女子語此草堂諸公得未曾有者恐吳興太守亦讓一頭矣昔少游滿庭芳山抹微雲一闋傳播人口其壻某爲細小所侮因大言

曰我乃山抹微雲女壻也聞者笑之若辰六筆下自有  
雨打梨花豈乞靈於泰山哉因序而歸之

序二

吳綺

江子辰六少負雋才長多雅望花生夢裏乃當代之文  
通璧在車中是吾家之叔寶篇章妙麗攬香草于中洲  
詩思清華照芙蕖以初日然而著述之暇長擬陶情擊  
簪之餘偏能顧曲窗前按律每協大晟燈下勻箋時裁  
小令西風漢闕發秋思於青蓮宿雨閒庭長春心於紅  
豆玉笙雞塞南朝宮體之篇羌笛黃河北里旗亭之曲

莫不調飛郢雪響遏秦雲譬種萱蘇見者愈三年之疾  
如皋蘭茝佩之生十步之香固可使周柳讓其妍思辛  
黃慙其麗唱矣爾乃半生驥坂數歷燕吳萬里龍標頻  
遊梁楚一雙蠟屐登覽既多數曲哀箏悲歌時有閒寫  
清暉於逸藻或傳瓊思以新腔嘗于斤竹嶺頭白紵染  
明霞之色時而蓮花社裏紅絃寫瀑布之聲侍女倚簫  
姜堯章之烟波十里將軍鐵板蘇玉局之雪浪千堆以  
此豪吟還將濟勝斯又極詞人之雅韻備樂部之幽情  
者矣昔者山抹微雲少游獲誇于子倩門開明月德璉

取重于婦家并屬美談傳爲軼事而予也參軍已老淒  
清湖海之音開府空歸蕭瑟江關之賦不覺聞聲而起  
舞惟言對酒以當歌爾

題詞

太倉吳梅村偉業曰秦柳蘇辛最難兼長辰六兩得之  
所以爲佳評閨思詞又曰小窗斜日到芭蕉半床斜月  
疎鐘後同此悲涼

嘉興曹秋岳溶曰阮亭云不纖不詭一往熨貼春燕詞  
之謂與

吳縣袁籙庵于今日詞尙艷冶亦忌穢惡此集獨得三昧

嘉興曹顧庵爾堪曰昔人謂淡而艷淺而深近而遠方是擅場此爲兼盡

杭州徐野君士俊曰園次巧于言情辰六工于寫景洵是冰清玉潤

三原孫豹人枝蔚曰能從無景處着景的是妙才

長洲尤悔庵侗曰風趣在冷朝陽鄭德璘之間

秀水朱錫鬯彝尊曰叔子謂廣陵佳麗地有能歌辰六

詩餘者知必名于江淮之間洵然

江寧紀伯紫映鍾曰玉艷珠鮮難爲彷彿

句容張菊人芳曰辰六情詞妙在艷而不膩故自迴出

流輩

貴陽府志越閭傳

越閭字辰六本姓江歙縣江邨人康熙二年以新貴越氏籍中貴州鄉試後乃復姓召試博學鴻詞授益陽知縣在縣多善政嘗建十九賢祠設書院課士有驅虎祈雨退水諸異蹟時長沙以吳逆之亂羽檄旁午閭備蒞菱供頓應給裕如以卓異賜袍服擢均州知州署鄖陽知府調解州知州州多宿逋上官檄一歲並徵閭請分年帶徵民困始蘇署平陽知府考滿報最升員外郎未上而卒著有覽古詩河汾集閭工詩通禮其外舅爲吳

蘭次綺嘗師事王文簡公士正又與吳蓮洋天章閣百  
詩若璩游四人者亟稱之綺有吾家叔寶之譽天章集  
中與江辰六詩凡數見其感悼江解州云春首華筵重  
一金大荒冰雪解知音牂柯名士今何在誰辨相如作  
賦心蓋以盛覽況之也士正序其覽古詩云門人江子  
辰六淹貫古今每與論史事俯仰數千年如指諸掌早  
歲絕江淮泛洞庭南窮夜郎盤瓠之鄉發爲詩歌浩落  
有奇氣覽古詩一卷則康熙丁巳適河東行役之所作  
也若璩潛邱劄記有與江辰六論汪鈍菴以幼子詔數

爲長子筠後爲非禮書闔精三禮故若璩引之與言也  
徐氏本事詩沈氏別裁集皆選其詩本事詩以闔爲貴  
陽人別裁集以闔爲歙縣人一據原籍一據榜姓也貴  
州通志歙縣志皆載其事一作越闔一作江闔一據榜

姓一據本姓也

貴州通志越闔貴陽人康熙癸卯舉人  
歷任山西解州牧勸學殖有知人鑑賞

識胥登甲乙榜爲政安靜不擾先是民間多  
宿逋檄一歲並徵闔請分年帶徵士民感之



黔詩紀畧補江員外闔傳證

貴陽陳田

闔

榜姓越

字辰六僑寓新貴

縣裁

原籍江南歙縣舉康熙

癸卯鄉試己未詞科以飛鳥污卷報罷選授益陽知縣

擢均州知州改解州

李集鶴徵錄辰六薦舉後歷知解州爲政簡靜不擾先是多宿逋檄

一歲並徵辰六詳請分年帶徵民德之

擢員外郎未上卒辰六師事漁洋

王士禎覽古詩序門人江子辰六早歲絕江淮與芝麓泛洞庭南翳夜郎盤瓠發爲歌詩浩落有奇氣

梅村荔裳竹垞秋岳茶村輩倡和吳蘭次詩詞宗匠辰

六爲其館甥尤西堂云吾友蘭次詞中秦九雅聞有婿